

## **Z A K O N**

### **O EKONOMSKO SOCIJALNOM VIJEĆU ZA TERITORIJU FEDERACIJE BOSNE I HERCEGOVINE**

#### **BiH**

#### **I OSNOVNE ODREDBE**

##### **Član 1.**

Ovim zakonom utvrđuju se osnivanje, principi djelovanja, sastav, način odlučivanja, djelokrug rada i nadležnosti Ekonomsko-socijalnog Vijeća za teritoriju Federacije Bosne i Hercegovine ( u daljem tekstu :ESV) , kao najvišeg institucionalnog oblika za vođenje tripartitnog socijalnog dijaloga, na području FBiH, kao i druga pitanja značajna za rad Ekonomsko-socijalnog vijeća.

##### **Član 2.**

Ekonomsko-Socijalno vijeće je nezavisno tijelo kojeg čine:

- Za teritoriju Federacije BiH: predstavnici Vlade FBiH, predstavnici reprezentativnih udruženja poslodavaca registrovanih u Federaciji BiH i predstavnici reprezentativnih sindikata registrovanih na teritoriji Federacije BiH.
- Za područje kantona predstavnici Vlade kantona, predstavnici reprezentativnih udruženja poslodavaca registrovanih u Federaciji BiH i predstavnici reprezentativnih sindikata registrovanih na teritoriji Federacije BiH.

Osnivanje, organizacija, nadležnost Ekonomsko-socijalnih vijeća za područje kantona uređuje se kantonalnim propisom.

Do donošenja tih propisa navedena pitanja regulišu se sporazumom socijalnih partnera.

##### **Član 3.**

Ekonomsko-socijalno vijeće ima svojstvo pravnog lica.

Registracija Ekonomsko-socijalnog vijeća vrši se kod federalnog ministarstva nadležnog za poslove rada.

Troškove za rad Ekonomsko-socijalnog vijeća FBiH obezbjeđuje Vlada FBiH u Budžetu, a troškove Ekonomsko-socijalnog vijeća za područje kantona Vlada kantona

Sjedište ekonomsko-socijalnog vijeća je u Sarajevu i u sjedištima kantona.

#### **Član 4.**

ESV svoje djelovanje zasniva na principima :

- vođenja socijalnog dijaloga kao sistema za rješavanje odnosa između socijalnih partnera i sredstva za postizanje ravnoteže između tržišne ekonomije i socijalne pravde;
- poštivanja nezavisnosti i autonomije socijalnih partnera u njihovom radu i organiziranju;
- obezbjeđivanja slobodnog pristupa adekvatnim i blagovremenim informacijama i dokumentaciji značajnoj za pitanja o kojima odlučuje ESV;
- poštivanja i provođenja odluka i zaključaka ESV.

## **II DJELOKRUG RADA**

#### **Član 4.**

Ekonomsko-socijalno vijeće kao najviše tripartitno tijelo na teritoriji Federacije Bosne i Hercegovine osniva se radi vođenja zajedničke djelatnosti socijalnih partnera u oblasti ekonomske, socijalne i razvojne politike, afirmacije i zaštite ekonomskih i socijalnih prava, odnosno interesa zaposlenika i poslodavaca, razvijanja sistema kolektivnog pregovaranja i zaključivanja i primjene kolektivnih ugovora.

#### **Član 6.**

Ekonomsko- socijalno vijeće :

- prati, razmatra i ocjenjuje uticaj ekonomske i socijalne politike i mjera ekonomske i socijalne politike na razvoj i socijalnu stabilnost;
- razmatra, podstiče zaključivanje i ocjenjuje primjenu kolektivnih ugovora i s tim u vezi dostavlja informacije i obrazloženja ministarstvu nadležnom za rad;
- podstiče mirno rješavanje kolektivnih radnih sporova;
- predlaže Vladi, poslodavcima i sindikatima vođenje usklađene politike cijena i plata;
- podstiče ideju tripartitnog, bipartitnog i drugih oblika socijalnog dijaloga na svim nivoima u rješavanju ekonomskih i socijalnih pitanja i problema;
  
- prati, razmatra i predlaže eventualne promjene zakona od uticaja na ekonomski i socijalni razvoj i u tom kontekstu položaj zaposlenika i poslodavaca;
  
- razmatra nacрте zakona, podzakonskih akata, programa i drugih dokumenata iz djelokruga svog rada i svoja mišljenja o tim dokumentima dostavlja Vladi Federacije Bosne i Hercegovine i Parlamentu Federacije Bosne i Hercegovine;
- prati primjenu zakona i ostvarivanje prava iz oblasti rada i socijalne sigurnosti i predlaže nadležnim organima i institucijama mjere za ostvarivanje i unaprijeđivanje tih prava;

- bavi se problemima provođenja procesa privatizacije i predlaže nadležnim institucijama eventualne izmjene zakonskih i podzakonskih akata koje bi doprinjele većim finansijskim efektima i zapošljavanju;
- prati stanje na području zapošljavanja, penzijsko - invalidskog i zdravstvenog osiguranja i u tom pravcu vodi aktivnosti na smanjenju crnog tržišta radne snage;
- podstiče aktivnosti na većoj efikasnosti nadležnih institucija sistema na sprječavanju korupcije,
- strategije razvija pojedinih oblasti.
- Razmatra Program rada Vlade FB iH.

ESV donosi Poslovník o svom radu.

### **III SASTAV EKONOMSKO-SOCIJALNOG VIJEĆA**

#### **Član 7.**

Ekonomsko-socijalno vijeće ima 22 člana.

Ekonomsko-socijalno vijeće ima predsjednika i po sedam (7) predstavnika svakog socijalnog partnera.

Svaka od delegacija samostalno bira predsjednika svoje delegacije.

Članovi ekonomsko-socijalnog vijeća imenuju se na 4 (četiri) godine.

Svaki član vijeća ima svog zamjenika, koji ga u slučaju odsutnosti zamjenjuje na sjednicama.

Predsjednik i članovi Ekonomsko-socijalnog vijeća imaju pravo na naknadu koja se utvrđuje posebnom odlukom ESV-a.

#### **Član 8.**

Vlada imenuje i razrješava svoje predstavnike u Ekonomsko-Socijalnom vijeću na prijedlog ministra nadležnog za poslove rada, a predstavnike sindikata i poslodavaca imenuju i razrješavaju sindikati i poslodavci.

#### **Član 9.**

Članu Ekonomsko-Socijalnog vijeća prestaje članstvo:

- smrću člana
- ostavkom
- istekom roka na koji je imenovan
- ako je pravosnažno osuđen na bezuslovnu kaznu zatvora u trajanju od najmanje 6 mjeseci
- razrješenjem.

U slučaju prestanka članstva u Ekonomsko socijalnom vijeću, socijalni partneri partneri mogu imenovati drugog člana najduže do isteka mandata trenutnog saziva Ekonomsko-socijalnog vijeća.

#### **Član 10.**

Predsjednik ESV:

- predstavlja ESV;
- saziva sjednice i utvrđuje prijedlog dnevnog reda za sjednice ESV uz konsultaciju sa predsjedavajućim delegacija;
- nadzire izvršavanje odluka i zaključaka ESV;
- i obavlja i druge poslove koje mu povjeri ESV.

Predsjednika ESV u slučaju njegove odsutnosti zamjenjuje jedan od predsjednika delegacije socijalnih partnera..

### **IV UNUTRAŠNJA ORGANIZACIJA**

#### **Član 11.**

Organizacione i administrativno tehničke poslove za Ekonomsko-socijalno vijeće obavlja Sekretarijat Ekonomsko-socijalnog vijeća.

Sekretarijatom rukovodi sekretar kojeg Ekonomsko-socijalno vijeće imenuje na period od 4 godine.

#### **Član 12.**

Ekonomsko socijalno vijeće, na prijedlog sekretara donosi akt o unutrašnjoj organizaciji, na koji saglasnost daje Vlada Federacije BiH.

#### **Član 13.**

Ekonomsko-socijalno vijeće može da obrazuje stalne i privremene komisije za razmatranje i predlaganje stavova po pojedinim oblastima, a naročito za :

- . politiku plata i kolektivnih ugovora;
- . porezni sistem, zapošljavanje i socijalnu politiku;
- . privatizaciju;

- . zakonodavstvo, provođenje propisa i ostvarivanje zaštite prava ;
- . javne djelatnosti;
- . entitetske i međunarodne odnose;
- . podsticaj izvoza;
- . politiku stranih ulaganja;
- . standardizaciju;
- . međunarodni transport;
- . energetska politiku.

Mišljenja koja daju komisije o određenim pitanjima obavezno se prezentiraju ESV prilikom razmatranja tih pitanja na ESV.

Komisije obavezno podnose izvještaj o svom radu.

Odlukom o formiranju komisije utvrđuje se djelokrug i način njihovog rada.

## **V NADLEŽNOST I NAČIN ODLUČIVANJA EKONOMSKO-SOCIJALNOG VIJEĆA**

### **Član 14.**

Ekonomsko-socijalno vijeće razmatra nacрте zakona i prijedloge drugih propisa iz člana 6. ovog zakona.

Ekonomsko-socijalno vijeće će na osnovu usvojenog Programa rada Vlade FBiH, dostaviti Vladi pregled propisa koje želi da razmtra i da na njih da mišljenje.

Svako ministarstvo je dužno da ESV vijeću dostavi prijedlog nacрта zakona i podzakonskih akata iz njihove nadležnosti koji treba da se upute u parlamentarnu proceduru.

Ministarstvo je dužno da u roku od najviše 30 (trideset) dana od dana dostavljanja mišljenja obavjesti Ekonomsko-socijalno vijeće o svojim stavovima.

### **Član 15.**

Ako ministarstvo ne prihvati mišljenje ili ga samo djelimično prihvati, Ekonomsko-socijalno vijeće može svoje mišljenje dostaviti Vladi.

Vlada je dužna u roku od najviše 30 dana od dana dostavljanja mišljenja obavjesti Ekonomsko-socijalno vijeće o svojim stavovima.

#### **Član 16.**

Ako Vlada ne prihvati mišljenje ili ga samo djelimično prihvati, Ekonomsko-socijalno vijeće može svoje mišljenje dostaviti Parlamentu FBiH.

Ekonomsko-socijalni partner čije mišljenje nije prihvaćeno od strane Vlade FBiH ima pravo da svoje mišljenje dostavi u pismenoj formi Parlamentu FBiH kao i da to mišljenje obrazloži na parlamentarnim komisijama i sjednicama oba doma Parlamenta FBiH.

#### **Član 17.**

Odluke Ekonomsko socijalnog vijeća donose se konsensusom socijalnih partnera.

Prilikom glasanja socijalni partneri glasaju odvojeno i o rezultatima svog glasanja izvještavaju ESV.

ESV može odlučiti da svi socijalni partneri glasaju zajedno kada se radi o proceduralnim i tehničkim pitanjima.

Svaki socijalni partner ima mogućnost i pravo da izrazi svoje vlastito mišljenje o zaključcima i odlukama ESV.

### **VII SJEDNICE**

#### **Član 18.**

ESV održava svoje redovne sjednice u pravilu jednom mjesečno, a najmanje jednom u 60 (šezdeset) dana.

Predsjednik ESV dužan je sazvati sjednicu na zahtjev ESV ili jednog od socijalnih partnera.

#### **Član 19.**

U radu ESV mogu učestvovati i neovisni stručnjaci iz različitih oblasti, predstavnici nevladinog sektora, kao stalni savjetnici bez prava glasa.

ESV može za potrebe svoga rada angažirati različite institucije, stručne organizacije i eksperte.

Na svoje sjednice, zavisno od pitanja koja se razmatraju, ESV može pozivati stručnjake iz tih oblasti, predstavnike sindikata i poslodavaca koji nisu zastupljeni u ESV.

## **PRIJELAZNE I ZAVRŠNE ODREDBE**

### **Član 20.**

Članovi Ekonomsko-socijalnog vijeća, imenovani prije stupanja na snagu ovog zakona, ostaju na svojim funkcijama do isteka mandata.

### **Član 21.**

Ekoomsko socijalno vijeće će izabrati Sekretara u roku od 90 dana po stupanju na snagu ovog zakona.

### **Član 22.**

Ekonomsko-Socijalno vijeće će donijeti akt iz člana 12. ovog zakona u roku od 15 dana od dana imenovanja Sekretara.

### **Član 23.**

Ovaj zakon stupa na snagu osmog dana od dana objavljivanja u "Službenim novinama F BiH".

Sarajevo,

Broj;

Predsjednik ESV-a

**FEDRACIJA BOSNE I HERCEGOVINE**  
**Federalno ministarstvo rada i socijalne politike**

**Prednacrt**

**ZAKON**  
**O EKONOMSKO SOCIJALNOM VIJEĆU ZA TERITORIJU**  
**FEDERACIJE BOSNE I HERCEGOVINE**

Sarajevo, avgust 2010.godine